



Inatsisartuni ilaasortat

Kristian Jeremiassen

/Maani

## Pineqartoq.: § 36, imm. 1 naapertorlugu apeqqummut nr. 2010-87-imut akissut

Asasara Kristian Jeremiassen,

Qasigianguit eqqaani erngup nukinganik innaallagissiorfiliortoqassanersoq pillugu apeqqutinnut qujanaq, suliaq pillugu nassuiaateqarnissamut periarfissimmanga.

1. **Qasigianguit eqqaani erngup nukinganik qaqugu nukissiorfiliortoqarniarpa? Erngup nukissiorfiliortoqassappallu sumiinnissaa eqqarsaatigineqarpa?**

**AKISSUT:** Qasigianguit eqqaanni erngup nukinganik innaallagissiorfiliortoqassappat, erngup nukinganik innaallagissiorfiliorsinnaanermut misissueqqaarnerit, kiisalu imminut akilersinnaassutsimik aningaasaqarnikkut naatsorsuinerit apeqqutaassapput. Misissueqqaarnerit imminullu akilersinnaassutsimik misissuinerit neriunaateqarpata, maannakkut pilersaarutaasut naapertorlugit sanaartorneq 2014-ip aallartinnerani aallartinneqartussatut natsorsuutigineqarpoq. Pilersaarutit malillugit erngup nukinganik innaallagissiorfik Qasigianguit kujatinnuani sananeqassaaq, Qasigianguaniillu ungasianiit aqunneqassalluni. Qasigianguani innaallagissiorfimmiit pilersuinerimi aqut 41 km-it missaanniissaaq. Kiisalu innaallagissiorfimmiit Aasiannut pilersuinerimi aqut 114 km-iussalluni.

2. **Erngup nukissiorfiliortoqarnissaanut misissuinerinik ingerlatsisoqarsimava? Misissuinerinik ingerlatsisoqarsimangippat qaqugu erngup nukissiorfiliortoqarnissaanut misissuinerinik aallartitsisoqarniarpa?**

**AKISSUT:** Siusinnerusukkut 1980-ikkut aallartinneranni annikitsunik misissueqqaarnernik suliaqartoqarsimavoq tassungalu atatillugu 1984-imi pilersaarusiassamut siunnersuusiortoqarsimalluni.

2010-mi aasap ingerlanerani qaqqami nunap ilusaanik sajuppillatsitsisarlungu misissuinerinik ingerlatsisoqassaaq, pilersuinerimi aqquasiassap siaarfissaa uppersineqassaaq aammalu sermip anorillu artukkiinissaanik uuttortaaniarluni misileraatissamik siaarsisoqassaaq.

Aamma imermik uuttortaasarfimmik ikkuseqqittoqassaaq erngullu ingerlaneramik uuttortaasoqassalluni, taamatullu sanaartornermi teknikkimut tunngasunik arlalinnik misissuisoqassaaq.

17. maj 2010

Sagsnr. 2010-030568

Dok. Nr. 371625

Postboks 909

3900 Nuuk

Tlf. (+299) 34 50 00

Fax (+299) 34 54 10

E-mail: iaan@nanoq.gl

www.nanoq.gl

2011-mi ilaatigut sikup pissusaanik misissuinerit aallartineqassapput, ukiuni tulliuuttuni 50-iniit 100-nut erngup sermersuarmit kuuttup erngup nukinganik innaallagissiorinissamut isumalluutaasinnaanera nalunaarsorneqassalluni, tassanilu aamma qaqqami nillissutsit kissassutsillu uuttortarneqassapput, nunap qeriuannartup qanoq annertutiginera misissorneqassalluni.

Aalajangiinissamut tunngavissap 2013-ip aallartinnerani piareemissaa naatsorsuutigineqarpoq.

### 3. Qasigianguit eqqaani erngup nukissiorfiliarineqarsinnaasumi illoqarfiit nunaqarfillu sorliit erngup nukinganik pilersorneqarsinnaappat?

**AKISSUT:** Qasigianguit aamma Aasiaat erngup nukinganik innaallagissiorfimmit pilersorneqassapput. Kiisalu Akunnaaq aamma lkamiut erngup nukinganik innaallagissiorfiliassatut eqqarsaatigineqartumit pilersorneqarsinnaassanersut misissorneqassaaq (titartagaq ilanngunneqartoq takuuk).

./

Pilersuinerimi aqqummit pingaarnermiit Akunnaamut aamma lkamiunut aqqusiisoqarsinnaassanersaq misissorneqassaaq. Missiliuinerit malillugit Akunnaamut pilersuinerimi aqut 8 km-it missaanniissaaq, aammalu lkamiunut pilersuinerimi aqut 14 km-it missaannut missiliorneqarluni. Pilersuinerimi aqqusiassaq 1 km-imut 2,2 – 2,5 mio. koruunit missaannik akeqassaaq. Avissaarfiliassat aamma transformeqarfiit sanaartorneqarnerinut akiusut taakkununga ilanngunneqassapput. Niaqornaarsuk aamma Kangaatsiaq maannakkorpiaq pilersuinerimi aqqusiiffigineqarsinnaanissamut atatillugu ungasinnerat aammalu sanaartornermut aningaasartuutit qaffasissorujussuunissaat pissutigalugit pilersaarutinit peerneqareerput. Piffissaq aningaasanik utertitsilluni akilersuiffiususaaq ukiut 35-it sinnerujussuarlugit sivisussuseqartussaammat.

### 4. Qasigianguani, Aasianni, Kangaatsiamilu erngup nukissiorfiliortoqaraluarpat Aasiaat Kangaatsiarlu erngup nukinganik tuniorarneqaleraluarpata aningaasat ukiumut qassit sipaarneqarsinnaappat illoqarfinni taaneqartuni?

**AKISSUT:** Maannakkorpiaq erngup nukinganik innaallagissiorfimmik sananermi sipaarneqarsinnaasut katinneri missiliorneqarsinnaanngillat, Qasigianguit eqqaanni erngup nukinganik innaallagissiorfimmik sanasoqassappat imminut akilersinnaassusisaaq naatsorsuiffigineqarsimanngimmat. Kisianni maannakkut paasissutissat pigineqartut tunngavigalugit ukiumut uuliamut sipaagassat naatsorsorneqarput, matumalu kinguliani takuneqarsinnaallutik.

Qasigianguani innaallagissamik kissamillu tunisassiornermut ukiumut uuliamut sipaagassat 2009-mi kisitsisit malillugit 2 mio. literit missaanniipput. Erngup nukinganik innaallagissiorfimmik, Qasigianguanut pilersuisussamik sanasoqassappat, uuliap literimut 4,3 koruuninik akeqarnerani ukiumut sipaagassat 8,6 mio. koruuniussapput.

Aasianni innaallagissamik kissamillu tunisassiornermut ukiumut uuliamut sipaagassat 2009-mi kisitsisit malillugit 5,03 mio. literit missaanniipput. Erngup nukinganik

innaallagissiorfimmik, Aasiannut pilersuisussamik sanasoqassappat, uuliap literimut 4,3 koruuninik akeqarnerani ukiumut sipaagassat 21,6 mio. koruuniussapput.

Akunnaami innaallagissamik kissamillu tunisassiornermut ukiumut uuliamut sipaagassat 2009-mi kisitsisit malillugit 91.000 literit missaanniippat. Erngup nukinganik innaallagissiorfimmik, Akunnaamut pilersuisussamik sanasoqassappat, uuliap literimut 4,3 koruuninik akeqarnerani ukiumut sipaagassat 390.000 koruuniussapput.

Ikamiuni innaallagissamut kissamullu tunisassiornermut ukiumut uuliamut sipaagassat 2009-mi kisitsisit malillugit 100.000 literit missaanniippat. Erngup nukinganik innaallagissiorfimmik, Ikamiunut pilersuisussamik sanasoqassappat, uuliap literimut 4,3 koruuninik akeqarnerani ukiumut sipaagassat 430.000 koruuniussapput.

Ukiumut sipaagassat katillugit 31 mio. koruuniussapput.

#### **5. Naalackersuisut erngup nukissiorfiliortoqarnissaanut qanoq aningaasalersuissallutik takorluugaqarpat.**

**AKISSUT:** Aningaasalersueriaasissaq maannakkorpiaq suli aalajangerneqanngilaq, tassanilu piffissami erngup nukinganik innaallagissiorfimmik sanaffiusussami periarfissat suussanersut apeqqutaassapput. Aamma erngup nukinganik innaallagissiorfimmik sananissamut erngup nukiga isumalluutaasussa qanoq annertutiginersoq, tamannalu inuiaqatigiit aningaasaqarnerat eqqarsaatigalugu ataqatigiissinnaanersoq apeqqutaasussaapput.

Allakkamut matumunnga ilanngunneqarput:

- § 36 2010-87 Pilersuinermi aqqutit
  - § 36 2010-87 Qasigianguani erngup nukinganik innaallagissiorfiliorfissaq pillugu paasissutissanut tapiliussat
- (Supplerede\_oplysninger\_vandkraft\_qasigianguit)

Inussiarnersumik inuulluaqqusilluta

Jens B. Frederiksen